

Carta nachindahá Pablo nuú na cúú cuéntá Jesús ñuu Colosas

Chíndahá Pablo Ndióxi coo na cúú cuéntá Jesús ñuu Colosas

¹ Yehe cúú Pablo, da nandicaxi Ndióxi cacuu u apóstol cuéntá Jesucristo. Ta yóho íin Timoteo, ñaní, da cúú cuéntá Jesús. ² Chíndahá nde carta yóho nu ndo, na cúú cuéntá Ndióxi ndúu ñuu Colosas jan. Jáchi cúú ndó na cúú cuéntá Jesucristo, na cándee cáhnu ini mé á. Ña cúni nde quea ná caja cuaha Ndióxi, tátá yo ñamaní xihin ndo ta ná caja ña ná coo vaha ínimá ndo.

Xíca tahví Pablo sahá na cúú cuéntá Jesús cán

³ Níí tiempo ndíquiahva nde ndixahvi nu Ndióxi, mé a cúú tátá Jesucristo, xitoho í tá xíca tahví nde nu mé á saha ndo. ⁴ Jáchi sa nañehé nde tuhun ña cándee ini ndó Jesucristo ta nañehé nde tuhun ña quíhvi ini ndó tóco ndihi na cúú cuéntá mé á. ⁵ Ta cája ndó ña yóho jáchi sa nacandaa ini ndó ña ndaa sahá Jesucristo ta ndáti ndó ndiquehe ndó ña quiahva Ndióxi nu ndó indiví. Ta janda naní naxini johó ndó tuhun vaha cáhan sahá Jesucristo já nacasáhá cúni ndó cuhun ndó indiví. ⁶ Mé tuhun vaha naxini johó ndó sahá Jesucristo yóho nacasáhá ndícuíta nuu a nuú ñayivi ta cuahá na sa cándúsa ña ndijáá níí cúú saha ñuyiví. Ta tóco ndihi na cán cája na tá quiahva nacaja mé ndó tá naxini

joho ndó ña quíhvi ini Ndióxi ndohó ta já nacandaa ini ndó ña mé a ndaa táhyí quíhvi ini Ndióxi ndohó. ⁷ Ña yóho quéa najánaha da naní Epafras nu ndo. Mé a ndaa quíhvi ini nde da jáchi in cúu da cája chúun da xihín nde ta mé a ndaa nacaja chúun da nu mé ndó xihín ndinuhu ini da tá najánaha da ndohó tuhun Ndióxi. ⁸ Ta tá naquixi da yóho já nacaxi tuhun da xihín nde ña cája ínimá yí Ndióxi ña quíhvi ini ndó na cúu cuéntá Jesús.

⁹ Ta janda naní nacandaa ini nde sahá ña cája ndó já nacasáhá xíca tahví nde nu Ndióxi saha ndó ndijáá ní quívi. Ta xíca tahví nde nu á ña ná naha nu ndo ña cúni mé á caja ndó. Ta xíca tahví nde nu á ña ná quiahva mé á ndaja táhan ña ndichí nu ndo ta ná caja mé á ña ná candaa ini ndó tóco ndihi ñaha cuéntá mé á. ¹⁰ Já quéa ná cuu caja ndó tá quiahva ndítahan caja ndó jáchi cúu ndó ñayivi cómi Ndióxi cuéntá saha. Ní tiempo xíní ñúhú caja ndó ña cáji ini mé á xihín. Ta quiahva já xíní ñúhú naha ndó ña cája tá cája ndó ña vaha xihín ñayivi ta quiahva já xíní ñúhú candaa chága ini ndó saha Ndióxi. ¹¹ Ta quiahva já xíca tahví nde nu Ndióxi ña ná ndaja ndacu a ndohó xihín nde cáhnu ndivaha mé á já quéa cuu caja ndeé ini ndó ta já a ndíhi ini ndó tá ná quixi cuhá tondóho nu ndo. Ta cají ini ndó ¹² ndiquiahva ndó ndixahvi nu Ndióxi jáchi nasacu tiaha mé á ndohó ña ná ndiquehe ndó ña nasacu ini mé á quiahva nu tóco ndihi na cúu cuéntá mé á tá ná xinu coo na nu yéhe ndivaha nuú cacomí mé á cuéntá saha ná. ¹³ Nasanduu yó nuú naá ndivaha ta cán natavá Ndióxi mí ndáha ña quini ta nandiquiahva mé a mí ndáha Jesucristo,

ja_hyi má_ni á ñ_a ná cacomí a cuéntá sa_ha yo. ¹⁴ Ta mé Jesucristo najáca_cu a mí tá naxi_hi a ndi_ca crúx_u ta na_caja cáhnu ini a sa_há cuachí.

Jesucristo cúú á jini nu tóco ndihi ñaha

¹⁵ Ta Jesucristo cúú yuhú nu_u Ndióxi, ñ_a a cuú cuni tívi ta jandá tá cámaní casáhá cava_ha Ndióxi ñuyívi yóho sa_h ín ja_hyi a, Jesucristo. ¹⁶ Ta sa_h mé Jesucristo na_cava_ha tóco ndihi ñaha ndúu ñuyívi yóho xihín ñ_a ndúu indiví. Ta mé á na_cava_ha tóco ndihi ñ_a xíní xihín nu_u yo xihín ñ_a a cuú cuni. Ta na_cava_ha mé á tát_o Ndióxi, ñ_a cómí chuun cuéntá Ndióxi ta na_cava_ha java ga_h tát_o a, na_h ín cu_ha ndée cahnda chuun. Tóco ndihi ñ_a yóho na_cava_ha Jesucristo ñ_a ná cacuu a ñaha mé á. ¹⁷ Ta sa_h ín va mé á tá cámaní cava_h sáhá sa_ha tóco ndihi ñaha ta cája mé á ñ_a ná cuu canduu tóco ndihi ñaha indiví xihín ñuyívi. ¹⁸ Ta cúú á jini nu_u tóco ndihi na_h cúú cuéntá mé á, na_h cúú tát_uhun yiquí cu_ñu a. Ta mé a cán caja ñ_a ná ndihvi ñayivi íchi mé á catacu na xihín ndée a jáchi anda sa_ha na_sah_iin mé á ta jihna ñúhú nanditacu tucu a tañu na sa_h naxi_hi. Ta xihín ñ_a yóho naxinu_u coo a nanduu a jini nu_u tóco ndihi ñaha. ¹⁹ Tá quiahva cáa Ndióxi quiahva cáa ri Jesucristo jáchi já cún_i Ndióxi coo. ²⁰ Ta cún_i ri Ndióxi ndique táhan máni tucu a xihín tóco ndihi ñ_a na_cava_ha. Ñ_a cán quéa naxi_hi Jesucristo ndi_ca crúx_u já ná cuu ndique táhan máni tóco ndihi ñ_a ndúu ñuyívi xihín indiví xihín Ndióxi.

²¹ Mé ndó na_sanduu xíca ndo_u nu_u Ndióxi ta naxini ihvi ndó a jáchi ndinuhu ñ_a núu na_sacahvi ini ndó caja ndó, nduu. Joo viti najándique táhan máni

Ndióxi ndohó xihin mé á ²² sahá ña ñacaja Jesucristo, jahyi a tá naxihí yiquí cuñu a ndica crúxu. Já ñacaja mé á ña ná cuu xinu ndó canduu vii ndó nu á. Ta nandiquiahva mé á ndohó ndáha Ndióxi já ná cacuu ndó ñayivi vii, na coó ga cuachi nu á. ²³ Joo xini ñuhú candeé cáhnu ini ndó Jesús ta a jándacoo xoo ndó ña ndáti ndó quiahva Ndióxi nu ndo. Jáchi tá naxini johó ndó tuhun vaha sahá Jesucristo já ñacandaa ini ndó ña cuu jácacu a ndohó. Ta sa mé tuhun yóho ndicuita nuu ndijáá ní cúu saha ñuyívi ta yehe cúu da chindeé táhan jándicuita nuu a nuú ñayivi.

Cája chúun Pablo cuénta na cúu cuénta Jesús

²⁴ Ta viti cájji ini i jáchi ndóho ini i saha ndo ta ña cája i quéa jáxinu coo i ña nasacu ini Jesucristo ndoho i sahá na cúu cuénta mé á, na cúu tátuhun yiquí cuñu a. ²⁵ Nandaja Ndióxi yehe ña ná nduu u in da caja chúun nuú na cúu cuénta Jesús. Jáchi nasahan mé á chuun yóho nuú i ña ná chindeé e ndohó sahá ña jánaaha cáxi i tuhun Ndióxi nu ndo. ²⁶ Ta janda tá ñacava sahá saha ñuyívi nasahiin jehé a nuú ñayivi joo viti najánaaha Ndióxi nuú na cúu cuénta mé á ña nasahiin jehé jihna. ²⁷ Ta viti sácú ini Ndióxi nahá nuú na cúu cuénta mé á ndá quiahva náhnu ñamani cuni caja mé á xihín na tóho. Ta ña nasahiin jehé cúu ña yóho: ndacaan Jesucristo ini ínimá ndo ta xihín ña yóho vaxi quivi ndicáhnu ndó xihin mé á.

²⁸ Cáxi tuhun nde nuú ndihi ñayivi sahá Jesucristo. Ta jácahan nde na ña ná a cája na cuachi. Ta xihín ndinuhu ini nde jánaaha nde nu ná ña ndítahan caja na já ná nduu na ñayivi ndaa nu

Ndióxi sahá ña naçaja Jesucristo. ²⁹ Ta ña yóho cúu chuun ndúcú ndéé e caja i xihin ndéé cáhnu sáhan Jesucristo nuú i.

2

¹ Cúni ña ná candaa ini ndó ña ndúcú ndéé e xíca tahví i nu Ndióxi sahá ndó xihín sahá na cúu cuéntá Jesús ndúu ñuu Laodicea. Ta quiahva já ndúcú ndéé e xíca tahví i nu Ndióxi sahá na cúu cuéntá Jesús, na a ñaha cuni táhan xihín i. ² Ndúcú ndéé e xíca tahví i nu Ndióxi sahá ná já ná ndihvi ndéé Ndióxi ini ínimá na ta in ná nduu na sahá ña quíhvi ini táhan na. Ta xíca tahví i nu Ndióxi ña ná candaa vaha ini ná ña ndaa sahá Jesucristo, ña mé a ndaa ndiyahvi ndivaha. Jáchi ña nasahin jehé jihna najánaha Ndióxi nu ná viti ta ña yóho cúu Jesucristo. ³ Ta mé Jesucristo cándaá ini a tóco ndihi ñaha. Cándaa ini a ndía quea ña núu ta ndía quea ña vaha ta cúni mé á ña ná candaá ri ini mé ví ña jan. ⁴ Cáxi tuhun i ña yóho xihín ndó ná a jándahvi inga na ndohó jáchi ndúu java na ta ndató ndivaha cáhan na joo cúu ná na jándahvi ñayivi. ⁵ Ta vatí co íin mí i xihín ndo nu ndúu ndó jan joo ñúhu ini i saha ndo ní tiempo. Ta cáji ini i tá xíní i ña ndúu víi xihín táhan ndó. Ta cáji ini i sándehe e ña co jándacoo ndó ña cándéé ini ndó Jesucristo.

⁶ Tá nandiquehe ndó íchi cuéntá Jesús já nanduu mé á xitoho ndó. Ta viti ndítahan nu ndó caca nuu ndó xihín á ndijáá ní quivi. ⁷ Xíní ñúhú cativi tuun ndó Jesucristo já ná quiahva mé á ndéé á nu ndo. Xihín tuhun Ndióxi ña najánaha nde nu ndó jan ndítahan cándéé chága ini ndó Jesucristo. Ta ná a jándacoo ndó ña ndíquiahva ndó ndixahvi nu mé á.

Íchi saá xíca í viti

⁸ Cuéntá coo ndó ná a jándahvi na ndohó xihín ña tuhún cúni na jánaḥa na nu ndo. Jáchi náḥa ña quíxi a nu Ndióxi joo cúú á ña quíxi jini mé va na cuití va. Ta cáḥan na saḥá ña jánaḥa ñayivi ñuyíví ta co cúú á ña jánaḥa Jesucristo nu yo.

⁹ Tá quiahva cáa Ndióxi quiahva já cáa Jesucristo vatí nanduu a in ñayivi. ¹⁰ Ta nandicutú ndaa mé ndó xihín mé á jáchi in nanduu ndó xihín Jesucristo, mé a sáḥndá chuun nu tóco ndihi na cómi cuéntá saḥá indivi xihín ñuyíví yóho. ¹¹ Ta saḥá ña in nanduu ndó xihín Jesucristo saḥá ña cán quea nanduu ndó ñayivi cuéntá mé á ta cúú á tátuhun nachicaan Ndióxi marca ndohó ta co cúú á tátuhun marca chicaan ñayivi yiquí cuñu na. Ña cája Jesucristo quea jácaxoo a mí nuú cuachi já quea ná a cája ga yó ña. ¹² Jáchi tá naḥandúta ndo cuéntá Jesucristo já naḥacu a tátuhun na xihí ndó ta nanduxu ndó xihín Jesucristo jáchi najándacoo ndó cuachi naḥaja ndó. Ta tá nanditacu mé á naḥacu a tátuhun nanditacu ri mé va ndó xihín á saḥá ña cán quea cúú ndó ñayivi saá viti jáchi naḥandeé ini ndó ña ín ndée Ndióxi caja ña ná nditacu Jesucristo. ¹³ Jihna naḥacu ndó tátuhun ndii saḥá cuahá cuachi naḥaja ndó ta saḥá ña coo naḥeen ndó caja ndó ña sáḥndá Ndióxi. Ta naḥajaja ndó tá quiahva cúni mé va ndó jáchi naḥacomí cuachi cuéntá saḥa ndo. Joo viti naḥaja Ndióxi ña ná ñeḥe táhvi ndó catacu ndó xihín Jesucristo ta naḥaja cáhnu ini a saḥa tóco ndihi cuachi ndó. ¹⁴ Naḥacomí yo cuachi nu Ndióxi jáchi naḥeḥe núu í ña naḥahnda mé á caja í. Ta ndácaan cuachi jata yó naḥaja ley joo najándoo Ndióxi cuachi tá na xihí Jesucristo ndica

crúxu saha yo. ¹⁵ Ta tá naxihí a ndica crúxu já naquee vaha mé á xihín tiñáhá sacuaḥa ta naquee vaha mé á xihín rí quini, rí sáhdá chuun nuú ñayivi ñuyíví. Ta sahá ña najácacahan Jesús nuu rí nuú ñayivi sahá ña cán queá a cuú chinúu ga rí cuachi jata yó viti. Xihín ña naçaja Jesucristo yóho najánaḥa Ndióxi nu yo ña a cuú ga caja tiñáhá sacuaḥa ni in ñaha xoho.

Ndítahan ndinducú yo ñaha ún indiví

¹⁶ A quehe ndó cuéntá sahá ñayivi tá ná candehé ndaa na ndohó sahá ña xíxi ndó á sahá ña xíhi ndó. Ta ni a quehe ndó cuéntá tá sándehe ndaa na ndohó sahá ña co cája ndó víco cája mé ná ta ni sahá ña co cája ndó víco quiví cája cáhnu na yoó saá. Ta ni a quehe ndó cuéntá tá sándehe ndaa na ndohó sahá ña co cája cáhnu ndó quiví ndíquehe ndée na. ¹⁷ Saḥa tá cámaní cacu Jesucristo já naḥanda Ndióxi chuun nuú ñayivi ña ná caja na ley Moisés joo coó chuun a viti jáchi sa najáxinu coo Jesucristo tóco ndihi ña naḥanda ley Moisés. ¹⁸ A cándúsa ndó ñayivi tá cáchi na xihín ndó ña cuhun ndó indayá sahá ña co cája ndó ña cáchi mé ná. Cája cáhnu na tát Ndióxi ta sahá ña jan ndája tohó ndivaḥa na mé ná. Ta cáchi na naçahan tívi Ndióxi xihín ná sahá ña cán queá ndíñehe jícó ndivaḥa na mé ná. Xíní túni na yóho cúú á xíní túni ñayivi ñuyíví cuití va. ¹⁹ Jáchi co xíca tuun na jan xihín Jesucristo, mé a cúú jiní nu mí. Mé á sahan ndée á nu yo cuahnu í ta jándique táhan mé á mí xihín á tá quiaḥva naḥacu ini Ndióxi.

²⁰ Tá naxihí Jesucristo ndica crúxu já cúú á tátuhun naxihí ndó nuú cuachi, jáchi co cómí ga

ñaha ñuyívi yóho cuénta saha ndó viti. Saha ña cán queá cõ ndítahan nu ndó caja ndó tá quiahva caja ñayivi ñuyívi yóho. Cõ ndítahan caja ndó ña cáchí na xihín ndó tátuhun ña yóho: ²¹ “A tñin toho ndó ña jan. A cáxí toho ndó ña cáa. A cáni ndaa ndáha ndó ña yóho”, cáchí na xihín ndó. ²² Tóco ndihi ña yóho ndihi saha. Tóco ndihi ña cája na yóho cúú á ña sáhdá ñayivi ñuyívi cuití va ta cõ cúú á ña naquixi nu Ndióxi. ²³ Jáchí tóco ndihi ña jánaha na jan cúú á ña quíxi jini mé va na vatí ndáa na tátuhun na ndíchí jini. Ta jánaha na ña ndítahan caja cáhnu ñayivi Ndióxi xihín costumbre nacavaha mé va na. Ta náha na tátuhun ñayivi tohó joo ndíñehe jícó na mé ná. Ta jánaha na ña xíní ñúhú jándoho í yiquí cuñu í joo cõ saha toho ña yóho jáchí cõ chindeé a mí jándihi saha ña xíca ini yiquí cuñu í caja.

3

¹ Tá nanditacu Jesucristo tañu na sa naxihí cúú á tátuhun nanditacu ndó xihín mé á. Saha ña cán queá xíní ñúhú ndinducú ndó ñaha cúú cuénta Ndióxi, mé ñaha quíxi indiví nu ín coo Jesucristo xoo cuáha Ndióxi. ² Xíní ñúhú cáhvi ini ndó saha ñaha cúú cuénta Ndióxi ta cõ xíní ñúhú ndicani ini ndó saha ñaha ñuyívi yóho. ³ Jáchí mé ndó cúú ndó tátuhun na sa naxihí tá naxihí Jesucristo. Saha ña cán queá cõ xíní ñúhú ndiava ini ndó cacomí ndó ñaha ñuyívi yóho jáchí cuhun ndó coo ndó xihín Jesucristo indiví nu ín Ndióxi. ⁴ Ta saha ña nacaja Jesucristo saha ña cán queá tácu yõ viti ta tá ná canáha nuu Jesucristo ñuyívi yóho já ndacanáha nuu ndó xihín á. Tá quiahva ndiyehẽ ndivaha mé

á quiahva já ndiyehē ri ndóhó va ta ndicáhnu ndó xihín mé á.

Jihna naxica í ichí cuachi joo viti xica í ichí saá

⁵ Ndítahan jácaxoo ndó nuú cuachi, ña cája ñayivi ñuyiví. Coto a cóo ndó xihín ñayivi, na co cúu ñájihí ndo á yí ndo. Ta ni a cája ndó ña núu xihín yiquí cuñu ndó ta ni a cája ndó ña núu, ña xica ini yiquí cuñu ndó caja. Ta ni a chínúu ndó ínima ndó jatá jiuhún ndo jáchi cúu ndó tátuhun na cája cáhnu yoco tá cája ndó já. ⁶ Jáchi vaxi quiví jándoho Ndióxi ini na cája ña yóho sahá ña co xéen na caja na ña cúnj Ndióxi. ⁷ Ta janda mé ndó tá naxica nuu ndó ichí cuachi já nacaja ndó ña jan. ⁸ Joo viti xíní ñúhú jándacoo ndó tóco ndihi ña jan: a cójo ga ini ndó xihín ñayivi ta ni a cája ga ndó ña xica ini yiquí cuñu ndó caja ta a cája ga ndó ña núu ta ni a cáhahá ga ndó xihín ñani táhan ndó ta a cáhan ga ndó tuhun quini. ⁹ Ta a cáhan túhún xihín táhan ndó jáchi co cúu ga ndó na nasacuu ndó jihna ta tóco ndihi ña núu nasacaja ndó jihna jan co cómi ga cuéntá saha ndó viti. ¹⁰ Jáchi viti sa nanduu ndó ñayivi saá, na loho loho ndivií chága ínima na cája Ndióxi janda quiahva ná xinu coo ndó nduu ndó tá quiahva cáa Jesucristo ta já candaa vaha chága ini ndó a. ¹¹ Jáchi viti coo sahá ga á tá cúu yó na Israel á tá co cúu yó na Israel, á tá cúu yó na naquihvi marca yiquí cuñu í á tá coo naquihvi marca yiquí cuñu í, á tá cúu yó na tóho á tá co cúu toho í na. Ta ni coo saha toho a á tá cúu yó na yucú ñúhú ta ni coo saha toho a á tá cúu yó na cómi xitoho cuéntá saha, á tá cúu yó na xica núná mé. Joo ña ín saha quea tá ná ndiquiahva ndó mé ndó ndáha Jesucristo ña ná

cacomí a cuéntá saha ndo jáchi tóco ndihi na cán cúu ná na ndácaan Jesucristo ínima.

¹² Quíhvi ini Ndióxi ndohó ta naçaxi a ndohó ña ná cacuu ndó ñayivi cuéntá mé á. Ta tá quiahva natahnda ini Ndióxi saha ndo quiahva já xíní ñúhú tahnda ini ndó sahá ñayivi. Xíní ñúhú caja vaha ndó xihin ná. Coto a cája cáhnu ndó mé ndó. Xíní ñúhú coo vii ini ndó xihin ñayivi ta a ndíhi ini ndó xihin ná. ¹³ Xíní ñúhú coo cáhnu ini xihin táhan ndó. Ta caja cáhnu ini saha táhan ndó tá yáha nu cája xihin táhan ndó. Tá quiahva naçaja Jesucristo, xitoho í tá naçaja cáhnu ini a saha ndó quiahva já ndítahan caja cáhnu ini saha táhan ndó. ¹⁴ Xíní ñúhú ndicutú ndaa ndó xihín ña quíhvi ini táhan ndó já queá ná cuu canduu in nuú xihin táhan ndó ta já a cúu cahnda java táhan ndó. ¹⁵ Ta ná caja Ndióxi ña ná coo vaha ini xihin táhan ndó já ná caja ndaa ndó xihin ná. Jáchi nasacu ini mé á ña ná caja ndó já ta naçaxi a ndohó nduu ndó tátuhun yiquí cuñu a. Ta ndítahan ndiquiahva ndó ndixahvi nu Ndióxi ní tiempo.

¹⁶ Ta ná ndicutú ndaa ínima ndó xihín tuhun vaha cáhan sahá Jesucristo. Ta xihín tuhun yóho xíní ñúhú jánahá táhan ndó ta xíní ñúhú quiahva tuhun ndeé ini táhan ndó ña ná candaa vaha ini ndó ña. Ta xihín ndinuhu ini ndó xíní ñúhú ndiquiahva ndó ndixahvi nu Ndióxi. Cata ndó salmo xihin himno xihin canto ña sahan ínima yii Ndióxi nu ndo. ¹⁷ Ta tóco ndihi ña cája ndó xíní ñúhú caja ndó ña cuéntá Jesucristo, xitoho í. Ta xíní ñúhú ndiquiahva ndó ndixahvi nu Ndióxi, tátá yo sahá ña naçaja Jesucristo, xitoho í.

Ndá quiahva ndítahan canduu na cúu cuéntá Jesús

¹⁸ Ndóhó, najihí ndúu yíi, xíní ñúhú coo joho ndó nu cáhan yíi ndó xihín ndo jáchi já ndítahan caja najihí, na cúu cuéntá Jesús. ¹⁹ Ta jári ndóhó, dataa, xíní ñúhú quihvi ini ndó ñájihí ndo ta co ndítahan caja ndó ndaja nacuu xihín ná. ²⁰ Ta jári ndóhó va, na valí xíní ñúhú taa joho ndó tóco ndihi ña sáhdá tátá náná ndo nu ndo jáchi ña yóho quea cájii ini Ndióxi xihín. ²¹ Ta jári ndóhó va, na ndúu jahyi, a jácojo quini ndó ini jahyi ndó já quea ná a cávitá ini na caja na ña vaha. ²² Ta ndóhó, na naxeen xitoho caja chúun uun va ndó, xíní ñúhú caja ndó tóco ndihi ña sáhdá xitoho ndó, na ndúu ñuyívi yóho nu ndo. Ta a juú tá ndíta cuití na sádehé na nu cája chúun ndó sahá ña cúní ndó candoo vaha ndó nuú na cúu xitoho ndó cán. Ña xíní ñúhú caja ndó quea caja chúun ndó xihín ndinuhu ini ndó nu ná jáchi cúu ndó na cája cáhnu Ndióxi. ²³ Ndítahan cajii ini ndó caja ndó tóco ndihi ñaha. Ta ndicuhun ini ndó ña nu Ndióxi cája ndó ña ta co cúu á nuú ñayivi cuití va. ²⁴ Jáchi sa cándaá ini ndó ña chahvi Jesucristo nu ndó saha tóco ndihi ña cája ndó. Ta ñehé táhvi ndo cuhun ndo indiví jáchi cája cáhnu ndó Jesucristo, mé á cúu ndusa xitoho ndó. ²⁵ Joo ndá na cája ña núu tandaa quivi ndoho ini na sahá ña núu nacaja na jáchi caja Ndióxi ña ná chahvi in in na sahá ña nacaja na.

4

¹ Ta jári ndóhó va, na cúu xitoho co ndítahan jándoho nahá ndó na naxeen ndó caja chúun nu

ndó jan. Ndítahan caja vaha ndó xihín ná jáchi vaxi quiví ndiquiahva ri ndóhó va cuéntá nuú Ndióxi, xitoho ndó, ña íin indiví.

² A jándacoo ndó caça tahví ndó nu Ndióxi xihín ndinuhu ini ndó. Ta ndítahan coo tiahvva vaha ndó ndiquiahva ndó ndixahvi nu mé á. ³ Caça tahví ndó nu Ndióxi sahá nde ña ná cuná mé á íchi nuú nde cahan nde tuhun vaha sahá Jesucristo, mé tuhun nasahiin jehé anda viti. Ta saha mé ña yóho ndácaan i vecaa viti. ⁴ Caça tahví ndó nu Ndióxi ña ná cuu cahan cáxi i tuhun Ndióxi nuú ñayivi tá quiahva ndítahan nuú i caja i.

⁵ Co ndítahan caja ndó ña yóho á ña cáa nuú na co cúu cuéntá Jesús. Ta xíní núhú ndihi ini ndó cahan ndó tuhun Ndióxi xihín ná. ⁶ Tóco ndihi ña cáhan ndó xíní ñuhú cacuu a ña vaha, ña cuu cajii ini Ndióxi xihín. Ta xíní ñuhú candaa ini ndó ndaja caja ndó nducú ñehe vaha ndó tuhun nuú ñayivi.

Ndídayí Pablo na ndúu ñuu Colosas

⁷ Chíndahá i da naní Tíquico nu ndó jan já ndicani da sahá i nu ndó. Mé da cúu ñani mání yo ta xihín ndinuhu ini da in cúu dá cája chúun da xihín i. ⁸ Chíndahá i da saa da nu ndo já ná caxi tuhun da xihín ndo ndá quiahva ndóho nde yóho. Ta chíndahá i da já ná quiahva da tuhun ndeé ini ndó. ⁹ Ta chíndahá ri ñani mání yo Onésimo, da ndíco cáhnu íchi cuéntá Jesús cuahan xihín dá ta mé Onésimo yóho cúu da ñuu ndó jan. Ta mé dá xihín Tíquico caxi tuhun da nu ndó ndaja cándo nde janda viti.

¹⁰ Aristarco, da ndácaan vecaa xihín i chíndahá da Ndióxi coo ndó. Ta jári Marcos, da cúu ñani

cuachí Bernabé chíndahá da Ndióxi coo ndó. Ta sa nacaxi tuhun i xihin ndo ndá quiahva ndítahan caja ndó xihin Marcos tá ná saá da coto nihni da ndohó. Xíní ñuhú ndiquehe vaha ndó da. ¹¹ Ta jári da naní Jesús, da naní tucu Justo chíndahá da Ndióxi coo ndó. Janda ndihuni na yóho cuití va cúu na cuéntá Jesús, na naquixi chichi Israel cája chúun na xihin i tá xíca nuu nde cáhan nde nuú ñayivi ña cómí Ndióxi cuéntá saha ná. Ta mé a ndaa nachindeé cuaha ndihuni na cán yehe. ¹² Ta jári Epafras, da ñuu ndó jan chíndahá da Ndióxi coo ndó. Mé da cán cúu dá da cája chúun cuéntá Jesucristo. Ta níi tiempo xíca tahví da nu Ndióxi saha ndó xihin ndinuhu ini da já ná candita ndacú ndó ta ná ndiquiahva níi ndo mé ndó caja ndó ña cúni Ndióxi. ¹³ Ta xíní i xihin nuú i ndá quiahva ndíhi ini Epafras xíca tahví da nu Ndióxi saha ndo ta sahá na cúu cuéntá Jesús ndúu ñuu Laodicea xihin na ndúu ñuu Hierápolis viti. ¹⁴ Lucas, da cúu doctor maní yo chíndahá da Ndióxi coo ndó. Ta jári Demas chíndahá da Ndióxi coo ndó.

¹⁵ Cahán Ndióxi ndó xihin na cúu cuéntá Jesús, na ndúu ñuu Laodicea ta cahán Ndióxi ndó xihin ñá naní Ninfas ta xihin tóco ndihi na cúu cuéntá Jesús táca vehe ñá. ¹⁶ Ta tá nandihí nachavi ndó carta yóho caja ndó ñamaní chindahá ndó ña ná cuhun a nuú na cúu cuéntá Jesús, na ndúu ñuu Laodicea ña ná cahvi ri na cán va ña. Ta jári ndítahan nu ndó cahvi ndó carta ña nachindahá i nuú na cán. ¹⁷ Ta caja ndó ñamaní caxi tuhun ndó nu Arquipo ña xíní ñuhú ndíhi ini da caja chúun vaha da chuun nasahan Ndióxi nu dá caja da.

¹⁸ Ta yehe, da cúu Pablo cáhyí i java tuhun yóho

nu ndó xihin ndahá i ña ná chindahá i Ndióxi
coo ndó. Xíni ñúhú ndicuhun ini ndó ña ndácaan
i vecaa. Ta ña cúni queá ná caja cuaḥa Ndióxi
ñamaní xihin ndo. Já ná coo.

**Tuhun saá ña najá^{ndacoo} Jesucristo nu yo: El
Nuevo Testamento en el mixteco de
Silacayoapan
New Testament in Mixtec, Silacayoapan
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

7f2d3ecf-6d15-55a5-9081-6e970474df2f